

# Tgi è Frank-Walter Steinmeier?

La spd fa part da la vita politica tudestga

DA GUIU SOBIELA-CAANITZ

■ **Ils 22 da mars 2017 è Frank-Walter Steinmeier (\*1956) vegnì saramentà sco president federal. Ins l'enconuscheva ordaifer la Germania sco anteriur minister da l'exteriur (2005–2009 e 2013–2017) ed en il Bundestag sco president da la fracziun spd (2009–2013).**

El è vegnì renumà pir avant paucs dis, cur ch'i n'è betg reussì a quatter partidas dal Bundestag da s'encleger per furmar ensemen ina regenza federala senza la spd. Il nov president federal, commember da la spd dapi 1975, era conscient da l'impurtanza per la vita politica tudestga da la partida da Willy Brandt (1913–1992) e Helmut Schmid (1918–2015). Steinmeier deplorava tant pli il «na» dal schef socialist Martin Schutz a mintga participaziun a la regenza federala. Uss ha il president federal persvas la spd d'e-

xaminar pussaivladads da collavurar puspè cun la cdu, partida da maiorità, per governar la Germania durant ils proxims quatter onns. Quai pudess muntar ina nova regenza manada puspè d'Angela Merkel.

## Termins impurtants da la regenza

Plis problems spetgan ch'ina tala regenza possia agir libramain. Tar dumondas europeicas è la vusch da la Germania decisiva. Co reglar l'extrada dal Reginam unì cun ina Theresa May che na para betg da survesair ils problems multifars da lez «Brexite»? Tge far cun l'immigraziun africana carmalada da la prosperità europeica? Co far frunt ad in Putin che siemia da restaurar l'imperi dals zars? L'Europa sto sa defender e na po betg pli sa fidar da l'agid american. Ils 13 da november han 23 commembers da l'Uniun

europeica (UE) suttascrit in project da «Cooperaziun structurada permanenta» («Pesco») per rinforzar la cooperaziun en las domenas da segirezza e defensiun. La lingia grossa sin la prima pagina da «Le Figaro» (Paris) tuna: «L'Europe de la défense veut s'émanciper des États-Unis». Duas ministras da la defensiun, Ursula von der Leyen (Germania) e Florence Parly (Frantscha) «han s'engaschadas il pli ferm per lezza cunvegna (...). Suttascrit han era t. a. Rumenia e Bulgaria, agitadas dals exercizis militars russ sin la Mar naira, ed ils trais pajais neutrals Finlanda, Svezia (...) ed Austria che na fan betg part da l'Allianza atlantica» (p. 6). Ils 11 da december sa radunan ils ministers d'affars exteriurs da l'UE; i pudesan cun quella occasiun discutir il Pesco. Tant pli impurtantas èn las fadias da president federal Steinmeier per gidar a furmar ina regenza stabla.